

Storie di un eroi furlan


La Universitât dal Friûl e fâs onôr a Tarcisio Petracco, un dai paris fondadôrs dal nestri ateneu.

» DI FEDERICA ANGELI

Intun moment pardabon dificil pe Universitât dal Friûl, dulà che la specialitât stessee dal ateneu e je metude in pericol, si davuelç une iniziative cetant impuartante: ai 26 di Novembar si scree la mostre par ricuardâ il centenari de nassite di **Tarcisio Petracco**, un dai paris de nestre Universitât. *'Cent agns de nassite di un eroi furlan'*, al è il titul pardabon induvinât de iniziative.

CENT AGNS DE NASSITE

Forsit pôcs jenfri i chei che a studiin a Udin a cognossin la storie dal lôr ateneu. Al è come se la sô existence e fos scontade, cuasi che il dirit di vê une universitât in Friûl al fos stât garan-



Tarcisio Petracco Intune foto de mostre "Cent agns de nassite di un eroi furlan" vierte fin ai 10 di Dicembar

tît di simpri. Nuie di plui sbaliât. Par podê vê la lôr universitât i furlans a àn scugnût scombatî cetant e, cundut che a son passâts dome pôc plui di 30 agns, in pôcs a cognossin i nons di chei che a àn puartât indevant cheste bataie. Jenfri chescj no si pues dismenteâ Tarcisio Petracco, il prin a crodi e a scombatî par chest progjet.

VITE LIBARE E CUSSIENTE

Une mostre di fotos par cognossi chest om, par rifleti su la sô vite libare e cussiente, siore di impegn e di sacrifici par rivâ a meti in vore i siei ideai e i siei siums. Une mostre che e pant la grande fede che Petracco al veve tal riscat e te rinassite dal Friûl e de sô int. Sintiments che a coventaressin ancje cumò, par dâ un scjas a cheste tiere de sô apatie e manciance di autocussiente.



ilfriuli@ifriuli.it